

**Parik Iri Shup Douk Pol
Nenekap Panam Timoti Iri
Banenyi Baraen Um Enyudok
Baraen Pol Narik Nenekan
Nyanak Um Timoti Iri**

1:1-2 Pol nakri Iruhin nini Jisas Kraiss hutaurum Timoti.

1:3-20 Pol nakrip Timoti um niyotu dodogowin aria mare numnek amam henek rohwmesh iri. Amam douk dodogowim atum hakripesh um shugipesh seiwokih aih.

2:1-15 Yopihi aih eshesh Kristen ta shunek um agundok shunek lotu um

3:16 Debeimi um Iruhin ananish arpesh iri hani amudok hataurumam iri hunekeh iri aih

4:1-6:21 Pol nakrip Timoti um sabaihi yopihi aih anan nenekeh um nutaurum eshesh ihishmorim Kristen um

1-2 O Timoti, eik Pol yenek apudok shup panakumagu nyak. Nyak douk nyatogur kabi eikin nuganin um. Nyak douk nyasuhw enyudok eik yenek skulumen-umen iri Iruhin ananin baraen nyagipeshen aria yohwaren nuganin. Eik douk anudok Iruhin douk narap matanamori mape wosik abom iri nani Kraiss Jisas hagraehe. Amam hagraehe aria hakripe dodogowinyi baraen um itogur Kraiss Jisas ananin aposel aria yakripesh ananin yopinyi baraen. Aria anan douk baugos abom um apak madukemesh um anan ta wata

nunaki nurap iri. Eik yakri apakin Yain Iruhin nini apakin Debeini aria Krai Jisas hunek gihau-
men aria hutaurumen meyoh. Aria shopunek,
yakri amam hunek nyakihw apahw hwur wosik.

Timoti Ta Nubo Madae Adurinyi Uwe Baraen Nyubuhuk

³ Nubokuhi eik yakri ikutinyukuk inak agudok shokugi nahobig Masedonia um, eik yakripeny-
umaguk um nyupe Efesus. Aria douk yakri
ikripen shopunek um nyupe abom Efesus aria
nyukrip amudok armam dodogowinyi baraen
um amam mare wata hunek skulumesh um enen
rohwinyi baraen shopunek, uwok. Amam ta
hukripesh Iruhin ananin baraen atin. ⁴ Nyak
nyukripam dodogowinyi baraen nyukri, “Ipak
mare pukripesh enyudok rohwin sakihasin
baraen, uwok. Aria mare pukripesh enyudok
seiwokin baraen um seiwokish nyeiguhw
douk arpes shanahwar um. Ipak piyagwreh
enyudokmori baraen um, ipak ta pupe um
punitok atin aria ta mare pugipesh Iruhin
ananim urkum, uwok. Enyen douk um apakin
bilip atin, Iruhin neyabigap ananim urkum.”

⁵ Aria baugenyum baraen um nyukripesh
enyudok Iruhin ananin baraen um, nyak douk
nyukripesh um nyishuhur shugipesh ehudok aih
um urkwip punawasham Iruhin nini kupaishi
arpesh um. Ehudok aih douk hakitaki yopuruhi
aparuh hani yopipi urkwip pani adurinyi bilip
um Jisas iri. ⁶ Aria anam amudok armam
douk hakutukuk ehudok yopihi aih aria hape
heyagwreh wehinyi baraen kabi douk shagugak

iri sheyagwrehen iri. ⁷ Amam hakri hutogur tisa omi um hunek skulumesh um Iruhin ananin lo. Aria hakri, “Apak madukemesh aria douk munek skulumep.” Amam douk hakri namudok aria amam madae hudukemesh um Iruhin ananin lo uwe. Aria shopunek amam madae hudukemesh um baugenyum um amamin baraen shopunek uwe, uwok.

⁸ Apak madukemesh um ta apak mukwu lo nyunek enyudok mour douk Iruhin nakri um enyen nyuneken iri um, lo enyen douk yopinyi. ⁹⁻¹⁰ Aria apak madukemesh um enyudok lo Iruhin douk madae nuneken nukriyen um yopishi arpesh uwe, uwok. Anan neneken um eshudok douk shenek yoweishi inahos iri um shukutishukuk aria shupe wosik. Iruhin nenek enyudok lo um eshudok douk shakri uwok um ananin lo shakenyuk agabus iri, shani eshudok douk madae shumnek baraen iri uwe, shani eshudok douk shakri uwok um ananin baraen aria shenek ihishumori yoweishi inahos iri. Eshesh shani eshudok douk shakri uwok um shunek lotu um Iruhin aria shenek yoweishi inahos iri, shani eshudok douk shabo esheshish amakenyish shagok iri. Eshesh shani eshudok douk shabo kupaishi arpesh shagok iri, shani eshudok douk shenek wehrur iri, shani amudok douk henek wehrur hani kupaimi armam iri. Anan neneken um eshudok douk shakwumesh aruh kupaishi arpesh sharaesh shanak um kupaishi shutorish iri, shani eshudok douk shenek rohwumesh iri. Eshesh shani eshudok douk shenek kwot obi nyutob eshesh shenek rohwumesh um baraen um kwot. Aria anan neneken um ihish-

morim arpesih shopunek douk shakri uwok um Iruhin ananin adurin atinyi baraeen shakenyuk agabus aria shenek eneshenesh yoweishi inahos iri. ¹¹ Enyudok baraeen douk nyagipesh ananin yopinyi baraeen douk anan nagraehe um inak ikripeshen. Enyen douk nyeyabigap um Iruhin douk yopuyopuni dodogowini abom nyeigur ny-ato iruh-uman iri.

Pol Nenek Tenkyu Um Jisas Um Iruhin Nenek Gihauman Natauruman Meyoh Um

¹² Eik yenek tenkyu um apakin Debeini Kraisi Jisas. Seiwok anan nataurume aria neneke dodogoiwe um yenek ananin mour. Anan douk nakri eik wosik apa yenek ananin mour wosik abom aria anan douk nakripe yeneken. ¹³ Aria seiwok sagomatin eik wata imnek Jisas ananin baraeen um uwe, eik yabubunim ananin nyeigur aria yakri uwok um anan. Aria yakri uwok um ananish arpesih douk shasuhw ananin baraeen iri aria yasuwesh yoweshikesh yenekesh shemnek debeiri eriger. Aria abudok nyutob eik yenekesh namudok um, eik madae idukemesh ikri eik yenek yoweishi inahos uwe, uwok. Eik madae isuhw ananin baraeen igipeshen uwe. Namudok aria Iruhin nakri gihaum eik aria madae nuwaname yoweishi inahos eik yape yenekesh iri uwe, uwok. ¹⁴ Aria apakin Debeini Kraisi Jisas nataurume meyoh abom nogabeye yatukur anan aria yape wosik. Namudok aria eik yasuhw ananin baraeen dodog yagipeshen. Aria shopunek, eik urkum manawasham kupaishi arpesih aria yataurumesh.

¹⁵ Enyudok baraeen douk adurin atin abom. Douk namudok aria apak ihishmorim ta musuwen dodog mugipeshen. Baraeen enyudok. Seiwok Kraiss Jisas nanaki agundok atap um nutaurum apak menek yoweishi inahos iri um nurap mutanamori mupe wosik abom. Aria kupaishi arpeshe shenek yoweishi inahos aria eik Pol douk yoweije iri abom yeshagrakuk eshesh um yenek yoweishi inahos um. ¹⁶ Douk namudok aria Kraiss Jisas nakri gihaume abom aria anan madae juwehosin um eik uwe. Anan nakri gihaume um kweipon ihishmorim shusuhw Iruhin ananin baraeen shugipeshen iri shudukemesh shukri eik yoweije iri abom. Aria Kraiss Jisas narae aria nagabeye um eikish yoweishi inahos aria ta shunek urkum shukri, “Kraiss Jisas nakri gihauman anudok yoweini arman abom aria naran nagabeyan um yoweishi inahos anan nenekesh iri. Douk namudok aria adur atin anan ta nunarao apak shopunek mupe wosik abom ihih nyumneh.” ¹⁷ Anan atun abom douk Iruhin. Apak madae mutrun apakis nabes uwe, aria anan ta mare nugok atin. Anan nape king ihih nyumneh. Aria eik yakri apak ihishmorim ta mukri anan douk Debeini aria munek lotuman mutuk ananin nyeigur nyuto iruhw ihih nyumneh. Enyudok baraeen douk adurin atin.

Pol Nakrip Timoti Um Nupe Dodogowin Nunek Iruhin Ananin Mour

¹⁸ Timoti, nyak douk nyenek Iruhin ananin mour aria eik douk yahwaren nuganin. Riguk wata weroroinyi um, amam profet hakripesh

um nyak ta nyunek Iruhin ananin mour wosik abom um. Aria eik yakri ikripen enyudok atin kabi seiwok amam hakri um. Aria nyak nyumneken aria nyusuwen nyugipeshen um nyupe dodogowin atin nyunek Iruhin ananin mour. Aria nyubo yoweishi inahos shubuhuk kabi anan soldia nenek mour ami iri neneken aria dodogowin atun um. ¹⁹ Nyak nyunek urkum um Iruhin ananin baraen douk nyasuwen aria gamo nyusuwen dodog nyugipeshen. Nyak ta urkum mur wosik aria mare mur um nyukri nyak nyenek yoweishi inahos, uwok. Enesh arpeshe douk shakri uwok um esheship urkwip pur wosik um. Eshesh urkwip porum yoweishi inahos aria shenekesh abom. Aria eshesh shakutukuk Iruhin ananin baraen aria shape kabi shagrukuk shabuh ogumigum youg um. ²⁰ Anam um eshudok douk shagrukuk shabuh ogumigum youg iri douk amudok biom Himeneus iri Aleksander. Amam habubunim um Iruhin aria eik Pol yenekumamuk enyudok um yoweini Satan ananis wis. Eik yenekumam enyudok um hunak hur Satan ananis wis um nom aria nenekam hudukemesh um amam mare wata hububunim Iruhin atin um.

2

Apak Munek Beten Um

¹ Harik iri aih apak ta munekeh iri douk ehudok. Eik yakri, “Ipak punek beten um Iruhin um. Aria ipak porigan um eshudok ipak eneshenesh wokepumesh iri, aria punek tenkyuman aria shopunek, porigan um nutaurum ihishmorim

arpesh. ² Aria porigan um nutaurum king-omi huni ihishmorim shape debeishi um gavman iri. Ipak punek beten um gavman namudok um apak mupe wosik, apakiruh aparuh hur wosik aria munek yopihi atih aih um munek enenyenen yopinyi Iruhin nakrienyeni. ³⁻⁴ Aria ipak punek beten namudok um, ipak ta punek Iruhin douk narap matanamori mape wosik atin aria anan nunadudareh. Aria anan shopunek douk nakri nuraio ihishmorim arpesh shatanam shupe wosik aria shudukemesh um adurin atinyi baraan aria shusuhwen shugipeshen iri. ⁵ Aria apak madukemesh um douk atun abom meyoh Iruhin nape. Aria apak ihishmorim arpesh mape wobur aria anan nape wobur. Aria atun meyoh arman abom nape orokohun um apak aria nonukop manak hurukatin um Iruhin. Anan douk Krai Jisas. ⁶ Krai Jisas douk nakri wosik aria nagok um nator apak ihishmorim arpesh apakish yoweishi inahos. Aria nakweshihap um apakish yoweishi inahos douk showeshikap iri. Aria ahudok nyumnah Iruhin nakri ahi, Jisas nagok um nukweshihap. Aria Iruhin neyabigap um mudukemesh mukri anan douk nakri nuraio apak ihishmorim mutanamori mupe wosik. ⁷ Douk namudok aria Krai Jisas nagraehe um irao ananin yopinyi baraan inak ikrip arpesh. Aria shopunek, nagraehe yatogur aposel um inak inek skulum kupaishi arpesh douk madae shudukemesh um Iruhin iri uwe. Eik inek skulumesh um enyudok adurin baraan um Krai um shudukemesh aria shusuhwen dodog shugipeshen. Aria eik douk madae inek rohwmep uwe, uwok. Eik yakripep

adurin atin.”

⁸ Eik yakri armam hape ihirubmorim warub iri ta hunek beten. Amam mare juwehosim aria hunitok, uwok. Amam ta hunagabe um hupe atugun hunek yopihi atih aih aria hunek beten.

Armago Ta Umnek Enyudok Baraen Ugipeshen Abudok Nyutob Shunak Shupe Shunek Lotu Obi Nyutob

⁹ Aria eik yakri armago shopunek ta upe wosik unawashok yopihi rupeh douk wosik um owo iri aria bane banehi mare wosik um owo ta uhunug iri uwe, uwok. Aria shopunek, mare unaginohw baragos suni yegeshiweruh um eshudok yopishi atish eneshenesh douk shatorish debeibori utabor iri, uwok. ¹⁰ Aria ipak armago apa pakri ipak pasuhw Iruhin ananin baraen penek lotuman iri ta punek ihinyumori yopinyi mour douk armago apa wenek lotu um Iruhin iri weneken iri. ¹¹ Aria punak pupe punek lotu obi nyutob, armago mare ukriפש Iruhin ananin baraen, uwok. Owo upe mokureg umnek Iruhin ananin baraen aria upe unek urukwipumen. ¹² Eik Pol yakri uwok um ono armago upe debeiworu um armam aria unek skulumam um Iruhin ananin baraen, uwok. Owo ta upe mokureg. ¹³ Seiwok sagramatin Iruhin nenek arפש um, anan narik nenek arman Adam iyoh aria nagiguk nenek armatok Iv. ¹⁴ Aria yoweini Satan douk madae nunek roh w um Adam uwe, uwok. Anan nenek roh w um Iv aria kwakutukuk Iruhin ananin baraen kwenek yoweishi inahos. ¹⁵ Aria ta armago umnek Iruhin ananin baraen usuwen dodog ugipeshen aria owo urkwip punawasham kupaishi arפש

utaurumesh, aria upe wosik unek yopihi aih aria mare uni kupaimi shiyagwreh* um, owo douk wosik wenek yopinyi. Aria ta unek yopinyi upe wosik namudok aria ubuki batowish um, Iruhin ta nurao utanamori upe wosik ihih nyumneh.

3

Amam Hape Debeimori Um Iruhin Ananish Arpesh Iri

¹ Enyudok baraen douk adurin. Aria anan nukri nupe debeini um Iruhin ananish arpesh nutaurumesh um, anan douk nakri nurao yopinyi abom sagomatinyin mour. ²⁻³ Aria nunek enyudok mour iri, anan ta nenek yopihi atih aih iri. Anan ta nunek yopinyi atin aria mare enesh arpesh shukri anan yoweini. Anan ta nurao atuk armatok. Aria anan ta nubo yoweipi urkwip pubuhuk aria anan mare urkum mur um nunek yoweishi inahos, uwok. Anan mare nuwok abar nugagak atin. Anan ta nutaurumesh nukesh eshudok eneshenesh um kupaishi arpesh. Anan ta nunek skulumesh nukriפש baraen wosik um shumneken aria shudukemesh. Anan mare juwehosin arigas atin um nini kupaishi shunitok, uwok. Anan nini eshesh shupe atugun. Anan mare nuhesh nukriפש debeg atin, uwok. Aria anan mare nunek urkum um nurao sabaibori utabor buni eneshenesh eshudok, uwok. Aria anan nunek yopinyi namudok um, anan wosik ta nunek enyudok mour. ⁴ Anan ta nutaurumok

* **2:15:** Enyudok baraen um uni kupaimi shiyagwreh um douk nyakrium mare uni kupaimi shenek wehrur um, uwok.

wosik ananik armatok kwuni ananish batowish aria nunekesh shumnek ananin baraen. Aria batowish ta shumnek ananin baraen aria mare shagogonigan atin, uwok. ⁵ Aria ta anan mare nutaurum um ananik armatok kwuni batowish wosik um, anan ta mare wosik um nunek mour um nutaurum Iruhin ananish arpush. ⁶ Aria ta anan seiwok natogur Kristen aria nasuhw Iruhin ananin baraen dodog nagipeshen arigaha douk um, anan wosik ta nupe debeini um Iruhin ananish arpush. Aria nubokuhi atin natogur Kristen um, anan mare nupe debeini um Iruhin ananish arpush, uwok. Um maresh? Ta anan nunek urkum nukri anan debeini nyeigur nyato iruh-uman nadukemesh um eneshenesh iri aria ta nukutukuk yopinyi baraen. Aria Iruhin ta nunek skeliman aria nukri anan douk yoweini nenek yoweishi inahos kabi douk seiwok anan nenek skelimum Satan um. Aria Iruhin ta nukri uwok abom um anudok arman kabi douk seiwok nakri uwok um yoweini Satan um. ⁷ Anudok douk nupe debeini um Iruhin ananish arpush iri ta nunek yopinyi um eshudok douk madae shusuhw Iruhin ananin baraen iri uwe shopunek. Anan nunekesh namudok aria arpush ta shutrun shukri anan yopuni madae nunek enesh yoweishi inahos iri uwe. Um maresh, ta eshesh shukri anan yoweini aria anan nugipesh Satan ananin baraen aria Satan nusuwan nuweshikan dodog.

Mamudok Douk Hataurum Debeimi um Iruhin Ananish Arpush Iri

⁸ Mamudok douk hataurum debeimi um Iruhin ananish arpush iri shopunek ta hunek yopihi

aih um ihishmorim arpesh shutrum aria shukri amam yopumi. Amam ta hunek ehudokmori yopihi aih. Amam ta hukripesh atin baraen ihishmorim arpesh. Mare hukripaguk enesh enen baraen aria enesh hukripeshuk kupainyi, uwok. Aria amam mare huwok abar hugugak atin. Aria mare hunek nyigiya um kupaishi esheshish eshudok eneshenesh shuni utabor, uwok. ⁹ Baugenyum um Iruhin ananin baraen seiwok nyanabeshuk, aria douk Iruhin nakrip apak ananip madukemen. Aria amam ta hunek urkum um enyudok atin baraen husuwen dodog hugipeshen. Aria amam ta urkwip pur wosik aria mare purum hunek yoweishi inahos, uwok. ¹⁰ Sagomatin ipak Iruhin ananish arpesh ta putik mamudok douk hakri hutaurum amam douk hape debeimi um Iruhin ananish arpesh iri. Putrum um hugipesheh wosik ihishmorim aih iganigadae yakripepumeh iri um, ipak wosik pukripam um hunekeh abom. Aria uwok um, ta uwok.

¹¹ Aria amamiyu armago* owowin baraen enyudok. Owo ta unek yopihi aih um ihishmorim arpesh um shutru aria shukri owo yopuworu armago. Aria owo mare ukripesh enen rohwinyi baraen kupaishi um kupaishi arpesh shenekesh iri yoweishi inahos, uwok. Owo ta unodukem usu merik um owo kanak aria unek owowin mour wosik abom.

* **3:11:** baugenyum baraen um oudok armago douk biyen. Enen nyakri hagok um debeimi iri amamiyu armago. Aria enen nyakri wataurum debeimi um Iruhin ananish arpesh iri.

¹² Mamudok douk hataurum amudok hape debeimi um Iruhin ananish arpesih iri ta hurao atuk atuk armago. Aria amam ta husuhw merik um amamiyu armago uni batowish hutaurumesh wosik. ¹³ Amam hutaurumam wosik amam hape debeimi um Iruhin ananish arpesih iri um, kupaishi arpesih ta shutrum shukri amam yopumi armam. Aria amam ta hudukemesh abom um amam douk hasuwen dodog abom Kraisi ananin baraien hagipeshen. Aria amam ta mare hunogugur um hukripesh enyudok baraien kupaishi arpesih um.

Baugenyum Baraien Um Iruhin Ananin Baraien

¹⁴ Eik yape yenyem apudok shup um, eik urkum mor yakri eik hurukatin um inaku itrin. ¹⁵ Aria ta mare dodogoiwe um inaku arigas um, nyak ta nyutik apudok shup aria putaurumen um nyudukemesh um ehudok yopihi aih douk ipak Iruhin ananish arpesih ta punekeh iri. Aria Iruhin douk nape ihih nyumneh iri douk nape numun ipakiruh aparuh. Ipak douk ananip um, atup awiropip douk patogur kabi ananit urupat iri um. Aria ipak douk pasuhw Iruhin ananin baraien dodog pagipeshen aria dodogowip atip pakripesh enyudok atin adurin baraien kupaishi um enyen mare nyubuhuk abom, uwok. Douk namudok aria ipak patogur kabi uroruh douk hosah urupat tatao dodog iri um. ¹⁶ Seiwok baugenyum Iruhin ananin baraien um agundok apak munek lotuman um douk nyanabeshuk abom. Aria ahudok nyumnah douk nyatogur yopugunum. Baraien douk enyudok.

Seiwok anan narao arpeshihw yegenyihw
natogur adurin arman kabi apak um.

Aria Iruhin ananin Mishin nyawishan aria Iruhin
neyabig

sabaishi arpesh shadukemesh shakri anan douk
Iruhin ananin nuganin.

Aria sabaishi Iruhin ananish enselahos shopunek
shatrun.

Aria ananish arpesh shanak sabaigosi nahobi-
gos shakriפש ananin baraan ihishmorim
arpesh.

Aria enesh shasuhwen dodog shagipeshen.

Aria Iruhin wata naran natoum iruhw heven aria
ananin nyeigur nyato iruhw.

4

Enesh Arpesh Shenek Skulumesh Aria Shenek Rohwumesh

¹ Iruhin ananin Mishin enyenyin baraan
nyatogur aria gamo nyakri kweipon eneshenesh
yoweishi sagabehos shani warehos ta shuhur
arpesh aria shunek rohwumesh. Aria
enesh arpesh ta shumnek esheshin baraan
shugipeshen. Aria eshesh ta shukri uwok um
shusuhw Iruhin ananin baraan shugipeshen um
aria shukutinyukuk. ² Eshudok douk shenek
rohwumesh abom iri ta shukriפש shukri
esheshin baraan douk adurin abom. Eshesh
shenek yoweishi inahos aria eshesh madae
shudukemesh shukri eshesh shenek yoweishi
inahos uwe, uwok. Um maresh, esheship urkwip
douk pogugak abom aria madae shudukemesh
um maren baraan douk rohwinyi aria maren

baraeu douk adurin uwe. ³ Eshesh ta shunek rohwmesh shukripesh um mare shurao armago, aria enesh mahish aria worigun eshesh shanowishesh. Aria apak masuhw Iruhin ananin baraeu dodog magipeshen iri douk madukemesh um adurin baraeu. Apak madukemesh um Iruhin nenek eshudok worigun iri mahish douk eshesh shakri apak mare mishoh iri. Iruhin nenek eshudok mahish iri worigun um apak munek beten munek tenkyuman aria mishoh. ⁴ Apak madukemesh, ihigunmorim worigun iri mahish Iruhin nenekesh iri douk yopishi. Aria apak mare mukri wokumesh, uwok. Iruhin nakri apak mishoh. Apak ta munek urkum um ananin baraeu aria munek beten munek tenkyuman um eshudok aria mishoh. ⁵ Um maresh? Ananin baraeu nyani apakin beten douk shenekesh shatogur yopish.

⁶ Aria ta nyukripesh enyudok baraeu yenyem apudok shup iri um Iruhin ananish arpeshe um, nyak douk nyenek yopinyi mour. Nyak nyukripesh namudok um, nyak ta nyupe yopinyi um nyuneken wosik abom iri Krai Jisas ananin mour. Aria nyak nyunek urkum um enyudok adurin baraeu apak munek bilipumen iri nyuni enyudok yopinyi baraeu nyak nyarik nyasuwen nyagipeshen iri um, enyen ta nyuneken nyutogur dodogowin. ⁷ Aria nyak mare nyunek urkum um enyudok seiwokin rohwin baraeu ipakish popehesh yamehesh sheyagwrehenyi, uwok. Enyudok baraeu douk madae nyukripep um Iruhin uwe. Aria ihih nyumneh nyak ta nyupe um nyudukemesh um nyak kanak um

nyunek yopihi atih aih Iruhin nakriyeh iri.
⁸ Nyak nyadukemesh, ta apak mukri munek bau-
 nag um munek apakiruh yegeshiweruh hutogur
 dodogowiruh um, enyudok apa nyataurumap.
 Aria ta mudukemesh um mutogur dodogowip um
 munek yopihi atih aih Iruhin nakriyeh iri um,
 enyen ta nyutaurumap wosik abom. Enyen ta
 nyutaurumap douk apak mape agundok atap um
 aria kweipon iruhw heven shopunek.

⁹ Enyudok baraden douk adurin atin abom.
 Douk namudok aria apak ihishmorim ta
 musuwen dodog abom mugipeshen. Baraden
 enyudok. ¹⁰ Apak madukemesh abom um
 kweipon Iruhin douk nape ihih nyumneh iri ta
 wata nurap um. Douk namudok aria apak munek
 ananin mour dodogowip atop. Aria memnek
 debeiri eriger um, apak apa meyotu dodog. Um
 maresh? Apak madukemesh abom um kweipon
 anan ta nurap. Adur anan ta nutaurum apak
 ihishmorim mape agundok atap iri. Aria adur
 atin anan ta nurao apak douk masuhw ananin
 baraden dodog magipeshen iri mutanamori mupe
 wosik.

¹¹ Enyudok dodogowinyi baraden eik
 yakripenyen iri nyak ta nyukrip kupaishi
 arpesk nyunek skulumesh um shudukemen
 aria ta shugipeshen. ¹² Eik yakri mare enesh
 arpesk shukri nyak weroroinyi aria shukri
 uwok um shumnek nyakin baraden um, uwok.
 Nyak ta nyunek ehudokmori yopihi aih.
 Nyak nyiyagwreh yopinyi atin baraden aria
 nyupe wosik nyunek yopinyi. Aria nyak
 ta urkum munawasham kupaishi arpesk

aria nyutaurumesh. Aria nyusuhw Iruhin ananin baraeen dodog nyugipeshen aria nyunek eneheneh yopihi abom atih aih Iruhin nakriyeh iri. Mare nyunek urkum um nyunek yoweih aih. Nyak ta nyunek yopihi aih namudok um eshesh Kristen shutrin aria shugipesh hatu iruhw iri aih. ¹³ Aria nyak ta nyunek Iruhin ananin mour dodogowin atin arigaha eik inaku. Aria mour nyak nyuneken iri douk enyudok. Nyak nyutarih Iruhin ananin yopinyi baraeen yopugunum um sabaishi shumneken. Aria nyukripeshen aria nyunek skulumesh um shudukemen wosik aria nyukripesh um shukutukuk yoweishi inahos. ¹⁴ Riguk anah nyumnah, amam hakripesh Iruhin ananin baraeen iri hakri um agundok ta nyak nyunek Iruhin ananin mour um. Aria hahudok nyumnah, amam hataurum Iruhin ananish arpesk aria howem wis nyakig barag um nyurao enen Iruhin ananin Mishin enyenyin presen um nyutaurumen nyukripesh Iruhin ananin baraeen um. Aria nyak mare urkum mukenyagak um enyudok presen, uwok. Nyak ta nyukwu enyudok presen aria nyunek mour wosik kabi douk riguk amam hakri um. ¹⁵ Aria nyak ta nyunek urkum um ihinyumorim baraeen eik yakripenyen iri aria nyugipeshen dodogowin atin. Aria nyakon abom nyak kanak Iruhin um nyugipesh enyudok atin baraeen. Nyak ta nyunekesh namudok um sabaishi arpesk shutrin aria shukri nyak nyenek Iruhin ananin mour dodogowin atin nyeshagrakuk riguk nyarik nyape nyeneken um. ¹⁶ Aria nyak ta nyutaurum nyak nyunekeh iri aih. Aria nyunek skulumesh

um, nyak ta nyukriפש adurin atinyi baraan atin um shumneken aria shugipeshen. Aria nyak ta nyupe um nyunek enyudok atin mour. Aria nyunekesh namudok um, Iruhin ta nutaurum nyak nyuni eshudok douk shemnek nyakin baraan iri shopunek nuraep putanamori pupe wosik.

5

Ehudok Aih Nyak Nyugipesh Um Nyutaurum Iruhin Ananish Arpesh Um

¹ Eshudok arpesh douk shenek yoweishi inahos iri nyak nyukriפש um shukutishukuk aria shunek yopihi aih. Aria nyukriפש um, nyak ta nyugipesh ehudok aih namudok. Rowehimi mare nyuhom nyukriפש debeg, uwok. Nyukriפש shokubur um hukutukuk yoweishi inahos kabi douk nyakriפש shokubur nyakin yaken um. Aria weroroimi nyukriפש shokubur kabi nyakriפש nyakim owarhim um. ² Aria ruwehew iri nyukriפש shokubur um ukutukuk yoweishi inahos. Aria owo shopunek, nyak ta nyukriפש shokubur kabi nyakriפש shokubur nyakiyu amakeniyu um. Aria weroroiwori nyukriפש shokubur um ukutukuk yoweishi inahos kabi nyakriפש nyakiyu mohwiyariyu um. Aria nyak ta nyunek urkum um nyunek yopihi atih aih aria nyukriפש.

Armam Hagok Hawosopuk Iri Armago Owowin Baraen

³ Armam hagok hawosopuk iri armago owowin baraan enyudok. Aria ono armago owowim

rahaem hagokuk aria owo arpesh uwok um shutaurumo iri um, nyak ta nyutuk owowish nyeiguhw shuto iruhw aria nyukrip Iruhin ananish arpesh um shutaurumo shuko worigun. ⁴ Aria ta onok okwokwin raminen nugokuk aria okwokwish batowish o barheshish shupe um, eshesh ta shutaurumok. Eshesh ta shugipesh Iruhin ananin baraan aria shutaurumok um shuwanamok enyudok seiwok okwok kweneken um eshesh iri. Aria shunekesh namudok um, eshesh ta shunek Iruhin nunadudareh. ⁵ Aria wawudok arpesh wokowori douk wasuhw Iruhin ananin baraan dodog wagipeshen wakri Iruhin atun ta nutaurumo, aria wape wenek beten nyumneh weibus. ⁶ Aria oudok douk wenek yoweishi inahos douk owo kanak urkwip porumen iri, owo douk wawok sabaiguni yopuguni worigun aria wanadudareh wape wosik. Aria owo douk madae ugipesh Iruhin ananin aih uwe. Douk namudok aria owo wape kabi douk owo wagok iri um. ⁷ Eik yakripen enyudok baraan um nyukrip ihiyumorim armago douk owowim rahaem hagokuk iri. Um mares, ta kupaishi shutru aria shukri owo yoweiwori armago. ⁸ Ipak ihishmorim ta putaurum eshudok ipak atop awirop um pukesh eshudok eneshenesh. Aria enesh arpesh mare shutaurum eshesh atop awirop um, eshesh douk shakutukuk Iruhin ananin yopinyi baraan douk shasuhwen shagipeshen iri. Aria eshesh douk shatogur yoweishi arpesh abom sheshagrakuk eshudok douk madae shusuhw Iruhin ananin baraan iri uwe.

⁹ Aria nyak nyuwem armam hagok hawosopukuk iri armago owowish nyeiguhw um, nyak ta nyuwem um oudokmori atuw owowish nyeiguhw. Oudok douk owowish kwarahos shenek uhwinyumaguk 59-poreish kwarahos, aria wani owowim atum armam shape aria madae unak unek wehrur atin uwe uni kupaimi iri. ¹⁰ Aria kupaishi arpes shatru shakri owo yopuworu apa wenek ehudokmori yopihi aih iri. Ehudok. Owo apa wataurumesh wosik owowish batowish aria apa wokesh eshudok eneshenesh kupaishi arpes shanaki kupairubi warub iri. Aria shopunek, owo apa wakwrup Iruhin ananish arpes douk shanak owowig urusag iri esheshiruh yeriweruh aria wataurum eshudok douk sharao amaen iri. Aria ihih nyumneh owo wape um wenek eneheneh yopihi aih atih. Nyak nyuwem um oudokmori atuw owowish nyeiguhw. ¹¹ Aria weroroiworu douk owowim hagokuk iri, nyak mare nyuwem um owowish nyeiguhw, uwok. Ta kupaimi urkum mutogurumo um ukri urao kupaimi armam aria owo ukutukuk marik iri urkum wakri unek Krai ananin atin mour um. ¹² Namudok aria owo ta baraen nyupenyu um agundok owo madae ugipesh owowim marik iri urkum um wakri adur um ta unek Krai ananin atin mour um. ¹³ Aria shopunek, owo apa arigeh hao wape meyoh aria wape um warahaen atin. Owo wape um wenek uwish togur wanak kupaigwi urusag. Aria watiguk kupaishi aria wata wanak wape wanumogesh eshesh. Ehudokmori aih Iruhin douk nakri uwok abom umeh. ¹⁴ Namudok aria

eik yakri wosik um weroroiwori douk owowim hagokuk iri wata urao kupaimi armam. Aria owo ubuki batowish aria upe unek mour um utaurumesh aria upe wosik. Um maresh, ta apakish horim douk shakri uwok um Iruhin ananin baraeen iri shukri apak yoweipari. ¹⁵ Ono armago douk amam hagok hawosopukuk iri douk waktukuk jurug yopinyi baraeen aria wasuhw Satan ananin baraeen wagipeshen. ¹⁶ Aria ta eshesh shasuhw Iruhin ananin baraeen iri eshesh atup awirop um ono armago douk amam hagok hawosopukuk iri uni eshesh upe um, eshesh ta shutaurumo shuko worigun nini eshudok douk owo wokumesh iri. Eshesh shunekesh namudok um ipak Iruhin ananip ta mare punek debeinyi mour um putaurum oudok armago um, uwok. Ipak ta putaurum oudok douk owowishi madae enesh shupeik abom um shutaurumo iri uwe atuw.

Amam Hape Debeimi um Iruhin Ananish Arpesh Iri Amamin Baraeen

¹⁷ Mamudok douk hape debeimi um ipak Iruhin ananish arpesh aria hataurumep henek mour wosik abom iri, ipak ta putuk amamish nyeiguhw shuto iruhw aria pukomabor wosik utabor buni worigun. Eik yakri um mamudok douk henek mour dodogowim atum um henek skulumep hakripep Iruhin ananin baraeen iri atum. Ipak ta putaurumam wosik abom. ¹⁸ Um maresh? Baraeen nyetem Iruhin ananik Buk iri Iruhin nakri namudok. Nakri, “Shashudok bulmakauhos douk sheyotu shenek mour um sheshish wit um sharumohw urubit iri, ipak

mare puweshik esheshig nokwatog, uwok. Eshesh ta shuwok anat ourehit wit.” Aria nakri enyudok kupainyi baraan shopunek nakri, “Eshesh shunek mour iri mare shuneken meyoh, uwok. Eshesh ta shurao utabor.”

¹⁹ Aria ta enen arpen nyukripen enen baraan um anan nape debeini um ipak Iruhin ananish arpesh iri nenek enesh yoweishi inahos um, nyak mare nyumneken, uwok. Aria biyesh o biyesh atin shukripen um, nyak wosik ta nyumnek esheshin baraan aria kadak nyukripan um mare wata nuneken atin. ²⁰ Mamudok douk hape debeimi um ipak Iruhin ananish arpesh aria henek yoweishi inahos iri, nyak ta nyuhom um hukutukuk eshudok yoweishi inahos. Nyak nyuhom abudok nyutob sabaishi Iruhin ananish arpesh shunatorum shupe obi nyutob. Abudok nyutob, nyak ta nyikitak aria nyukripam dodogowinyi baraan um amam mare wata hunek yoweishi inahos. Nyak nyunekesh namudok um kupaishi shopunek shunogugur aria mare shunek yoweishi inahos.

²¹ Iruhin nani Krai Jisas hani Iruhin ananish enselahos shatruhw esheshis nabes aria eik Pol yakripen dodogowinyi baraan um nyumneken aria nyugipeshen. Baraan enyudok. Nyak ta nyukripen enyudok atin baraan eik yakripen-enyi. Nyukrip Iruhin ananish arpesh douk shenek yoweishi inahos iri um mare wata shunekesh shopunek. Aria nyukripen um, nyak mare nyukripen kupainyi nyeiguhw shatoumesh iri arpesh, aria mare nyukripen kupainyi nyeiguhw wokeshi iri uwe, uwok. Nyak

ta nyukripesh atin baraan ihishmorim arpesh.
²² Aria nyak mare arigas nyenekesh um nyugraeh anan arman um nunek Iruhin ananin mour, uwok. Ta enesh arpesh shutrin um nyutaurum anan nenek yoweishi inahos iri arman aria shukri nyak shopunek douk yowenyari kabi anan um. Aria sagomatin nyak ta gamo nyudukeman wosik ba iyoh aria nyuwem wis ananig barag aria kadak nyukripan um nunek Iruhin ananin mour. Aria nyak ta mare nyunek urkum um nyunek yoweih i aih aria nyunek eneheneh yopihi abom atih aih Iruhin nakriyehi.

²³ Aria eik yakri ikripen enen baraan shopunek um agundok arugeh atih hen um. Nyak mare nyuwok abar atubar, uwok. Nyak ta nyuwok anabar karoibar wainibar abar shopunek um apahw mare hwunatuken. Aria shopunek um kupaihi arugeh mare hen ihih nyumneh.

²⁴ Anam armam douk henek yoweishi inahos yopugunum iri, apak douk madukemam um amam douk yoweimi. Aria Iruhin ta nunek skelumam nukri amam douk henek yoweishi inahos. Aria kweipon ta nuwanumam yoweishi inahos amam henekesh iri. Aria anam hanabeshuk henek yoweishi inahos iri, apak madae mudukemam uwe. Aria kweipon amamish yoweishi inahos ta shutogur yopugunum aria Iruhin ta nuwanam yoweishi inahos amam henekesh iri.

²⁵ Aria douk namudok atin. Anam armam henek yopihi aih iri mour yopugunum aria sabaishi shatrum aria shadukemam. Aria anam henek yopihi aih iri mour habeshukesh aria apak madae mudukemesh uwe. Aria kweipon amam

ta hunowereh hutogur yopugunum aria sabaishi shutrum. Aria apak shopunek ta mudukemam.

6

Shape Shakamum Kupaishi Shenekumesh Mour Meyoh Iri Esheshin Baraen

¹ Shenekumesh mour meyoh kupaishi iri esheshin baraen enyudok. Eshesh Iruhin ananish arpesh douk shape shakamum kupaishi shenekumesh mour meyoh iri ta shumnek esheshim debeimi amamin baraen shugipeshen. Eshesh ta shukri amam douk debeimi aria shumnekam. Eshesh shunekesh namudok um ta mare enesh arpesh shukri enen yoweinyi baraen um Iruhin nini enyudok baraen apak munek skulumesh-enyi, uwok. ² Aria ta enesh Kristen shunek mour meyoh iri esheshim debeimi douk henek bilip iri um, eshesh mare shunek urkum shukri amam hani eshesh douk Iruhin ananish atish aria eshesh mare shumnekam, uwok. Eshesh douk shenek mour um henek bilip iri douk eshesh urkwip panawashamesh iri. Douk namudok aria eshesh ta shunekumam yopinyi mour abom shishagrakuk enyudok douk sheneken um eshudok douk madae shusuhw Iruhin ananin baraen iri uwe. Aria ihih nyumneh nyak ta nyunek skulumesh um enyudok baraen aria nyukripesh dodogowin atin um eshesh shugipeshen.

Shanagrem Sabaibori Utabor Bani Eneshenesh Eshudok Iri Esheshin Baraen

³⁻⁴ Apakin Debeini Jisas Kraais ananin yopinyi baraen douk nyakripap um musuhw Iruhin

ananin baraen dodog mugipeshen aria munek skulum kupaishi um shugipesh ananih aih. Aria eshudok arpesh douk shakutukuk enyudok yopinyi baraen aria shenek skulumesh um kupainyi rohwin yi baraen iri shakri eshesh kanak nyeiguhw shato-umesh aria shadukemesh abom iri. Aria uwok, eshesh douk shagagak abom. Eshesh madae shudukemesh um Iruhin ananin baraen uwe. Eshesh urkwip porum shakri shupe um shuni ipak punitok atin aria shape shanitok um ihinyumorim enenyenen baraen. Namudok aria shaho arpesh aria esheshiruh aparuh juwehosiruh um kupaishi shakri eshesh yoweishi. Aria eshesh urkwip porum kupaishi arpesh shakri eshesh shenek yoweishi inahos. Aria eshesh shenek rohwi. Aria shenek nyigiya um kupaishi esheshish eshudok eneshenesh aria shape shani ipak panitok. ⁵ Eshesh madae shudukemesh abom, shagagak aria shapeum shakri shunitok atin. Eshesh shakutukuk adurin atinyi baraen aria shenek rohwi shakri ta eshesh shugipesh Iruhin ananih aih um, eshesh ta shurao sabaibori utabor buni eneshenesh eshudok. Aria esheshin baraen douk madae adurin uwe, uwok. ⁶ Aria ta apak dodogowip atop um mugipesh Iruhin ananih aih aria mukri eneshenesh apakish eshudok shani utabor douk jurugishumap um, apak ta munadudareh abom aria mupe wosik. ⁷ Seiwok apakiyu amakenyiyu wopubuki-umori, apak madae musuhwi enesh eshudok eneshenesh uwe, uwok. Aria ta wata namudok atin. Kweipon apak mukutukuk agundok atop um shopunek, apak ta mare muna-

suhw enesh eshudok munak, uwok. ⁸ Namudok
 aria ta apak murao anagun worigun nini ru-
 peh shukusumap um, apak ta mukri eshesh
 douk wosik-umap. ⁹ Aria eshudok arpes
 shakri shunarao sabaishi eneshenesh eshudok
 shuni utabor iri Satan ta nukwiraesh um
 shunek yoweishi inahos. Aria eshesh ta shunek
 yoweishi inahos aria ta shupe yowesh abom
 kabi bur reir maduhw um. Aria eshesh ta
 mishish shikitak abom um shunek eneshenesh
 yoweishi inahos douk shagagak iri arpes
 shakri shunekesh iri. Aria eshudok yoweishi
 inahos ta shunekesh shugagak abom aria
 eshesh ta douk shupe yowesh abom. ¹⁰ Aria
 enesh arpes douk mishish shakitak abom
 um shakri shurao sabaibori utabor buni
 eneshenesh eshudok aria eshesh douk
 shakutukuk Iruhin ananin baraan douk
 eshesh shasuhwen shagipeshen iri aria
 sharao dedeben atinyi amaen. Um maresh?
 Baugos um arpes shenek yoweih aih um
 douk agundok um eshesh mishish shakitak
 abom um shakri shurao sabaibori utabor
 buni eneshenesh eshudok um.

*Nyahur Debeg Um Nyurao Agundok Um Nyupe
Wosik Ihih nyumneh Um*

¹¹ Aria nyak Iruhin ananin nyenek ananin
 mour iri ta nyuruwokuk um ihishmorim es-
 hudokmori yoweishi inahos. Aria nyak ta
 dodogowin um nyugipesh ehudok yopihi aih
 namudok. Numun nyakihw apahw, nyak ta
 nyupe wosik aria nyunek yopihi aih atih kabi
 Iruhin nakri um. Nyak nyusuhw ananin
 baraan dodog nyugipeshen aria nyak ta
 urkum munawasham kupaishi arpes aria
 nyutaurumesh.

Aria abudok nyutob nyak nyurao enen dodog um, nyak ta nyupe dodog. Nyak mare juwehosin nyukri nyuho enesh arpes, uwok. Nyak ta nyukripesh shokubur. ¹² Nyak ta nyusuhw Krai ananin baraan dodog nyugipeshen kabi douk anan nenek resis iri nahur debeg um. Aria nyak shopunek douk namudok atin. Nyak ta dodogowin abom um nyugipesh Krai ananin baraan aria nyurao agundok abom um kweipon nyupe wosik abom ihih nyumneh um. Kabi douk seiwok Iruhin nahwaren aria abudok nyutob nyak nyani sabaishi arpes pape penek lotu aria nyakitak nyakripesh enyudok yopinyi baraan um. Nyak nyakri Krai Jisas anan douk dodogowini aria nyak nyasuhw ananin baraan dodog nyagipeshen.

Aria douk abudok nyutob nyak nyakri namudok aria Iruhin naraan nakri nyak nyupe wosik abom ihih nyumneh. ¹³⁻¹⁴ Seiwok baugos um, Iruhin nakwarum ihishmorim eneshenesh shape iruhw atap iri aria eshesh douk shape. Aria riguk Krai Jisas douk nakripesh yopinyi baraan yopugunum aria anudok debeini um gavman iri Pontius Pailat nemneken aria nenek kwotuman. Aria douk anudok Iruhin nani Krai Jisas hatruhw amamis nabes aria eik yakri ikripen enyudok baraan um nyumneken aria nyugipeshen abom. Nyak ta nyupe wosik um mare enesh arpes shukri nyak yoweinyi, uwok. Aria mare enen baraan nyupenyen. Nyak nyusuwen dodog abom Iruhin ananin baraan nyugipeshen aria nyunekesh namudok atin arigaha nyunak nyutogur um ahudok nyumnah apakin Debeini Jisas

Krais nutanamori ahi. ¹⁵ Ahudok nyumnah Iruhin nakri ahi, anan ta nishopoki Jisas Krais nunaki nutogur yopugunum. Anudok Iruhin anan douk baugos abom um apak munadudareh um. Anan douk yopuni abom.

Anan douk Debeini abom um apak ihipmorim mape agundok atap iri. Anan nasuhw iruhw atap aria nape Debeini um ihim-morim debeimi hani ihim-morim king douk hape agundok atap iri. ¹⁶ Iruhin anan atun ta mare nugok atin, uwok. Anan douk nape ihih nyumneh aria agundok anan napeum douk bogaragun abom aria natrugun abom. Aria apak arpesh douk madae mutrun apakis nabes uwe, uwok. Seiwok arigaha douk shopunek ta mare enesh arpesh shutrun esheshis nabes. Kweipon shopunek, ta mare enesh arpesh shutrun, uwok. Aria eik yakri apak ihipmorim mutuk ananin nyeigur nyuto iruhw aria mukri anan nupe Debeini ihih nyumneh. Adur atin.

Shanagrem Sabaibori Utabor Bani Eneshenesh Eshudok Iri Esheshin Baraen

¹⁷ Nyak ta nyukripesh enyudok dodogowinyi baraen eshudok arpesh douk shanagrem sabaishi eshudok eneshenesh shani utabor iri um shumneken aria shugipeshen. Nyak nyukripesh um eshesh mare shunagunukuk shukri eshesh debeishi shanagrem sabaishi eshudok shani utabor iri, uwok. Aria nyukripesh um eshesh ta mare shukri wosik um eshudokmori douk kweipon ta burukworesh shunak shuwishuk iri. Apak muni ipak ta mukri wosik um Iruhin douk apa nakop abom ihishmorim yopishi eshudok eneshenesh aria nenekap

manadudareh iri. ¹⁸ Aria nyak ta nyukripesh enyudok dodogowinyi baraen shopunek um shumneken aria shugipeshen. Aria nyukripesh um shunek eneheneh sabaihi yopihi aih. Aria eshesh ta shutaurum kupaishi shukesh eshudok eneshenesh um yaruhish iri. Aria shutaurum kupaishi arpesh shopunek. ¹⁹ Aria shunek yopihi aih namudok um, adur atin eshesh ta shunabuk esheshish yopishi eshudok eneshenesh shukus-umesh iruhw heven. Eshesh ta shukus iruhw arigaha ahudok nyumnah hunaki aria Iruhin ta wata nashanam-umesh aria shupe wosik abom ihih nyumneh.

Nyak Ta Gamo Nyurukorubesh Nyakin Mour Wosik Abom

²⁰ Timoti, nyak ta gamo nyurukorubesh um enyudok ihinyumorim Iruhin ananin baraen eik yakripen-enyi. Aria nyukutukuk ihinyumorim rohwin baraen enesh arpesh shape sheyagwrehenyi. Enyudok baraen madae nyugipesh Iruhin ananin baraen uwe. Eshesh shenek rohwi shakri esheshin saki douk adurin aria yopinyi, aria uwok. Esheshin saki douk nyakri nyubo Iruhin ananin aih hubuhuk. ²¹ Aria enesh arpesh shakri eshesh douk sharao enyudokmori saki aria eshesh shakutukuk jurug Iruhin ananin yopinyi baraen douk eshesh riguk shasuhwen shagipeshen iri.

Aria eik yakri Iruhin nutaurumep meyoh ipak ihipmorim.

IRUHING ANANIN BARAEN
The New Testament in the Central dialect of the
Arapesh language of Papua New Guinea
Nupela Testamen long tokples Arapesh long Nuigini
copyright © 2003 Wycliffe Bible Translators, Inc.

Language: Arapesh

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-05

PDF generated using Haiola and XeLaTeX on 11 Nov 2022 from source files dated 9 Oct 2020

2bc22d5b-c527-53fd-8d75-3cc4c2e66cc9